


道咸同光朝詩史甲集

陳衍署檢

PL
2306
.S8
v.9





章 棧字一山浙江臨海人光緒甲辰翰林現官檢討

郵傳部參議上行走有一山詩文集



定東陵行禮歸途感賦用戚南塘盤山絕頂詩韵

寒年鶴語有餘哀

時爲孝欽顯皇
后二周年之期

白日堂堂霧未開

闕殿香沈飛鳳出宗藩餒畢獵禽來山川龍虎騰王氣魚
水君臣屬霸才莫箸茂陵封禪草漢家有詔下輪臺

題盤山

我本天台人素懷在山澤驅車出薊門來作盤山客盤山
何物奇所奇松與石松故幹老蒼石尤撐空碧想自皇古
初補天留遺迹不受秦政鞭不齒謝安屐磊落而嶽嶠橫
空摩峭壁田盤昔潛蹤田疇繼分席遂成隱者名佛亦置
香積此石氣縱橫負高累千百舉世尙脂韋獨居岸巾幘

舉世好附趨獨寐懷孤僻是以當路人望之驚魂魄或以
怪相嗤或以頑致惜洪維我聖祖三顧來徵辟亦越我
高宗玉步臨山脊翦茅建行宮與之共晨夕經營八表
餘天章輝珠璧因地量其才靈巖供刻畫登封泰岱巔
未足踰絢赫爾石被殊榮非以詭隨獲受寵仍不驚所報
無奇策願爲崇朝雲霖雨及蠻貊願障橫海流磐安奠中
宅世變日支離所恃寸心赤敢告盤山靈吾言當不易

題雲罩寺舍利塔

出入東華近十年相忘身住大羅天偶來絕頂臨風立四
面嵐光落眼前

椽筆留題萬象環浮雲忽起障邊關

塔院西壁天津徐相國師題萬象在旁四

大字光緒癸巳十月時方官編修也名臣志業安排早我亦從容到此間

陳 毅字詒重湖南湘鄉人光緒甲辰進士現官郵傳

部候補參議

君爲劉幼雲同年廷琛分校所得士學
行力追古人師弟之間契洽無倫幼雲

贈君楹帖以通儒名德相期詩詞不多作所作均非
凡響挽張文達及邊馬吟西山諸作尤爲沈摯

邊馬吟

邊馬出雄關英姿動鳴咤天風吹番旗落日照大野豈知
章臺旁驕驄繫芳厓天生毛骨奇馳騁詎相假但願成人
功安能老都社土苴視豐芻蹴雪汗流赭神駿迴絕倫胸
中有區夏黃沙漫空來顧視自閒雅振鬣偶長嘶方皋世
豈寡勁弓依壯兒寶劍醉良冶此馬能報君將軍孰健者

小孤山

寒濤千頃赴吳門鎖鑰重關砥柱存山影中流坼荆域江
聲北走挾雷源雲霄一驚摩峯頂風雨老龍吟洞根故里

彭郎今寂寞陰旗猶簇舊乾坤

登岳陽樓

北峽南湘此建樓危欄橫瀉洞庭秋魚龍寂寞生朝冷蛇
象荒唐見古愁六鎮旌旗晴嶽色蔽江舳艫老成謀

彭陽
剡水

軍於楚材淘盡湖千古坐看風雲起上游

登黃鶴樓

多難登臨意更孤滔滔祇見濁流汙百年江漢思靈傑萬
里舟車雜晉胡武夏地居天下紐廟堂誰定宅中圖憑欄
試向長安望一夜西風淚眼枯

寂寂

寂寂生遙夜浮生寄託微更繁風乍定燈暗月多輝佳日
看看盡頻年事事非如何北渡雁嘹唳向東飛

嚴 復字幾道號幼陵福建侯官人宣統元年 特賞

文科進士現官直隸候補道學部丞叅上行走

辛丑三月北行和熊季廉作

十九世紀初告終搏搏員地趨大同神機捭闔初變化爭
存物競誰爲雄至人先天不滯物高下體合同張弓心知
斯民致仁壽何徒食苦師蓼蟲大哉培根氏告我觀物見
道冥纖洪三王五帝各垂法當其時可皆爲功蚩蚩之氓
俾自主如適洲渚浮臙臙及其時過仍墨守無益徒使百
弊叢矧茲天意在混一異類殊俗終棣通是時閉拒議自
守何異毛毳當爐烘履而後艱常智耳旣懲勿省庸非惜
四萬萬人皆貴種遂使奴隸神將恫所以百千億志士欲
持建鼓搥頑聾賢愚度量幾相越聽者一一如耳充膠膠

擾擾何時已新舊二黨方相攻去年北方致大釁至今
萬乘猶塵蒙亦知天心未悔禍南奔避地甘長終豈意逃
空得罄欬知心幸遇四五公就中愛我最親摯僕指先屈
南昌熊心期渾欲忘彼己圭角細與加磨礪人生行止不
自詭扁舟忽欲隨南風瀕行握手無所贈惟有空氣如長
虹橫流他日儻相遇所願身道雙加豐

戊申五月白題已卯小影

鏡裏分明隔世身相看三十過來春風燈骨肉今餘幾土
梗形神定孰親已有人歸留鶴語更無松老長龍鱗君聽
石子岡頭曲休說虞翻骨相屯

上海劉氏園見白蓮孤開歸而成詠

五首錄三

三伏炎蒸晝轉雷羣倫炊甑向塵埃一株娟澣標高格此

是靈山會上來

露筋祠外月初上仙掌峯前風正清
欲采盈盈太孤絕胸中長此玉崢嶸

南薰無地嫁娉婷手築盆池養夕馨
身怯九天風露冷樓臺倒影浸秋星

題蘇戡八股舊稿

讀書志祿仕道已成禽犢彼哉東方生
文史三冬足魏晉用九品隋唐取書牘
詞賦資求才猶網張一目美意制十
科迂論司馬諫已而程經義作計非不熟
爾來九百年奚翅億管禿得者矜文儒
旅進猶鳬鶩假令長閉關千世用
一律豈知天運改因應紛萬族瞠目倚
虛僑舊學等無術往者經世談洎今
令人慙廻思趙幽州半部語真毒迺
今

又一變龍蛇起新陸論語供燒薪六經任生醯渡海求羊
皮歸爲五穀鬻挾瑟吹笙等所志皆食肉侈侈輸文明盡
成果羸祝始知變法令真無與清濁夫惟大雅姿於法靡
所宿當爲穀中遊已褰方外躅斟酌新舊間緣此爲經督
讀君制菽文同時須膺服

贈陳弢老三首

夢想南陽八百桑風雲事業入祠堂公今二紀親田畝猶
有觚棱不忍忘

鄉里攀翻近卅年樽前相對各華顛不妨磨洗裝風景六
十流光下水船

世事從伊海變田我曹諧笑盡前緣相逢吉語無多慰但
說詩功勝舊年

羅愔融字揆東廣東順德人優貢生現官郵傳部郎中

挽長沙張文達師三首

凌晨促府趨行李廣路塞入門問諸孤灑涕氣彌結執其
少者手泣對腸欲裂傷哉十齡童類父入豪髮持喪若成
人賓僚嗟秀出贈言勉孝友勤讀光先烈聆語信知感亢
宗理可必婢僕淚恨襟不忍棄斯宅風淒靈輿舉目慘衆
哀激觥觥尙書府龍門高百尺萬流爭趨壑存問及鞮譯
去年壽觴舉冠蓋傾一國今年素車來杳不盈什一生死
交情見喧寂世態出飛旒出郭門萬古音塵絕燕雲莽淒
黯湘波定嗚咽他時西州門車過盈痛惻

憶昔辛壬間籌學集眾謗憂危耿不寐委曲跂一當積誠

恃信主卓絕賴冥契于

晦仲若黃韜

文章宗吳

肇甫

嚴陵又天下望

汪頌王書號博物張小李亦實宗匠五百識聚賢時流孰

堪抗闢新驚羣聳露刃森相向屹立鎮駭流百川此東障
仇仇生徒會天門開誅蕩羣材待陶甄皇風日敷鬯志未
竟百一孤懷冀誰諒萬方悲一槩山頽吾安仰廉頑範來
詰跂瞻鑄蠡像

斯文日殂喪大道嗟久裂朝貴謝宏獎風流愈衰歇公實
秉至誠求士若飢渴獎誘到薄技苞苴絕宵謁汪汪千頃
波日月互吐納公存士氣伸公歿正氣滅王路塞清夷履
蹈荊棘長官務氣使賤士善容悅唯訶等奴厮濡慙甘
婢妾文采致爲災直節終自賊嗟哉受恩人渺若非素識
悠悠天地間念此心魂折吾生絕知已誰更念薄劣還當
慰公靈益勵歲寒節

孫寶琦字慕韓浙江錢塘人蔭生現官山東巡撫

甲辰孟夏于役西班牙京都贈日本赤羽公使

雅聞才望重扶桑槃敦叨陪共一方樽酒風流知逸興歌

行慷慨見真腸機謀可畏嗤歐美

君謂白人機智可畏餘不足取

種族須

嚴辨白黃雲水蒼茫東海指捷書惟盼報遼陽

露西絕似虎狼秦東掠西侵進取頻營路築成謀並拙

秦築

長城俄營西伯里鐵路皆自謂萬世之業不旋踵皆敗

銷兵弭戰計翻新

秦銷天下兵器俄創

和平會於荷蘭異曲同工

璧歸趙土終無闕

指東三省

鼎重周京莫問津唇

齒相依有同志報言仗義賴東鄰

疊前韵呈諸和者

四首

憂時撫事感滄桑國信縱橫使四方詩詠脂韋慚媚骨言
多圭角露剛腸漢廷原自重騫武朝右微聞尙老黃 聖

母會逢開壽域昇平祇合賦朝陽

昔日論文笑過秦環球得失較量頻人才豈必分歐亞朋

黨何煩辨舊新忠讜卽今空獻策名言自古賴傳津

胡馨吾云

泰西名言多與吾古聖賢合

輶軒近接多豪俊海外論交幸結鄰

莫笑浮屠戒宿柔欲除煩惱覓良方每承朋輩加青眼敢

謂生平具熱腸義取正名窮道白

荀子正名篇說不行則白道而冥窮

論參

齊物任雌黃放懷天地原如寄坐看浮雲送夕陽

何處桃源可避秦山深林密夢中頻長留宗國衣冠舊厭

聽中原戰伐新蘇武但聞能仗節宣尼底事諷知津羈棲

海外渾無賴且向江邊訪釣鄰

郊居近河多釣艇以上二首次韻詠懷

耆齡字壽民滿洲正紅旗人官內閣學士有蠖齋集

蔣貞女詞

羅綺不如布鉛華不如素繁霜委百草乃見女貞樹解一雲

黯黑兮賊兵來望天涯兮女心摧有父遠宦燕南陲母老

妹弱將依誰解二賊叩門阿母無色鄰里奔賊入屋小妹牽

衣雞犬伏傾箱倒篋女不瞑得全骨肉焉辭貧解三賊無端

賊屢顧身可殺豈可侮把刀撻面紅闌干呼母罵賊賊膽

寒兒貌雖毀兒身完解四勸母勿悲勸妹勿哭賊去還來有

鳩已蓄地下可同歸銜杯血漉漉風淒淒兮月照幃母攜

手兮妹肩隨父何在兮宮門楣魂有知兮應淚垂

客寓波廵俞恪士出示新詩卽題卷尾時辛丑正月

慘澹烽煙黯兩京春風也自到江城眼中誰有匡時略笛

裏愁聽入破聲
憔悴徒傷同越鳥
飄零何意遇蘭成
干戈滿地驚華髮
一讀新詩百感生

雜詩 錄三首

嵒嶠雲中寶月樓
珠簾高卷記宸遊
花藏鳳管清歌細
柳拂爐煙綵仗浮
銀漢影移頻望幸
白蘋風急忽驚秋
宮車虜騎同經過
回首寒泉日夕流

請纓慷慨辭金闕
臥鼓倉皇走路歧
霸上平添新壁壘
眼中中非復舊旌旗
空悲日冷荒三殿
爭說時巡向九疑
台省久無憂國淚
可能青瑱哭朝儀

殷地雷鳴動鼓聲
秦關百二望全迷
傾城想像遮雕輦
極漢雲山隔碧雞
痛哭何人能復楚
聯衡無計可全齊
舊時豐沛今衰歇
振臂猶聞有駃騠

偕客遊西山香界寺登絕頂歸途成詠

西山日在眼冥想接雲岫看山不到山毋乃爲世詎先喜
獲同心招邀踐巖竇離郊未十里已覺嵐影湊快然展良
覲蒼煙落衫袖筍輿山腳迎厯險等飛猱一徑入松樾虧
蔽變晴晝下有寒泉鳴萬古瀉石霑沿緣被礧草側耳迷
喬冑微風拂鼻觀疑有林花秀不辨是何香逕欲掬水嗅
仰看香界寺傾葢成邂逅升階作小憩淪茗清可漱樹杪
羅川原開襟見錯繡商量更造顛此意吾已畜置身正壑
中正恐爲境囿不辭腰腳疲方知所得富奇情四面來一
覽無遺漏東南指王城煌煌列層構西北俛桑乾浩浩轉
奔溜卻望清山尖劬迤出羣峰右斜陽半沒趾濃翠露堅
瘦十載困黃塵自笑眸如豆平時結夢寐今始發其覆徘徊

四庫全書
卷之六
三
徊不忍去呼僮屢視候暮色起遙空下方鐘鼓奏勝游期
再舉僧房容暫僦會待月明時攜酒一相就

二牖泛舟

雲際山峩峩城灣水瀾瀾升高固足豪臨流亦可喜憶昨
陟翠微豈料今在此世事波上萍安能問行止人生貴適
志吾乃偶然耳不見隄上柳婀娜隨風靡煙容作意青日
照可憐紫晦明咫尺間百變復何理從誰叩兩端爲我究
原委船舷一俛仰林轉境又徙幽深易平曠卻顧未移晷
遠碧草連天低空霞散綺維舟就曲岸或可遇蘅芷喧喧
鬧鵝鴨發發集魴鯉物性本難齊所樂不須訾當其喋唼
時焉知有泥滓吹息溷世塵瑱屑同糠粃素月漸窺人清
歌迴樯起西望認遙岑已入蒼茫裏

三 多字六橋蒙古鑲紅旗人現官庫倫辦事大臣

歸綏得冬雪次尖父韻

白鳳羣飛墜羽纖大青山上朔風嚴精明積玉欺和璧皎

潔堆池奪塞鹽

蒙鹽產於池

沙亥

蒙言鞋

無塵卽珠履板申

蒙言房屋

明史作板升

不夜况華檐鐵衣冷著猶東望極目觚棱第幾尖

無垠一白莫塗鴉大放光明蔑戾車

佛經言邊地也

難得遐荒皆

縞素不分榆柳盡梨花瓊樓玉宇三千界毳幕穹廬十萬

家預兆春耕同頴瑞陳平宰社餉烏父

滿蒙以少牢祀神饋餉其勝日烏父

邊塞苦寒蒔花不易偶購盆梅數株紅者尤佳適讀

樊山先生紅梅詩和而賞之

八首錄四

誰憶春寒賜錦袍夜光杯酒醉蒲萄千頭奴婢呼丹橘一品夫人認絳桃雪北暗香和鶴守江南芳訊託魚勞太陽

不是偏相照的的先開直幹高
冬心剛冷得春暉一笑渾如畫錦歸林下美人除粉素山
中宰相盡衣緋豔於桃李何曾俗烘到雲霞也不肥玉照
堂前三百本幾時移入綺羅幃

迢迢東閣報開花出塞姬嬙憶漢家曲度雙聲賡絳樹功
成九轉鍊丹砂聰明未必輸冰雪濃豔無妨效曉霞鄉事
向君應問訊芳風可透綺窗紗

一枝濃抹上猩屏不向林家鬪尹邢丹的點題增斌媚絳
紗封臂惜娉婷長庚酒沁吟詩筆後主羅圍奏曲亭每到
黃昏搖燭照仙標越瘦越瓏玲

登歸化城北樓書感

長風萬里詎能乘聞道黃河昨夜冰地接大荒聊縱眺天

垂圓蓋讓飛昇悅無情話疎親戚畏不懷歸豈友朋鈴閣
無人來獨嘯雲中鸞鳳一齊鷹

移節庫倫信懷民軍帥索題冒鈍宦京卿詩卷子因
感舊遊惜別懷人不覺一時交集也

長安多貴人輕肥事裘馬十載少年場總覺吾黨寡信侯
人中龍風流亦儒雅自紆萬戶尊強仕歸茅舍

立民通侯有竹籬茅

舍季方更不凡公卿長揖謝人道二難并我謂二疏亞西

湖與之拋前年來日下日下二三子一笑臂同把春風桃

李園秉燭遊良夜丹鳳復飛來頓促東山駕任尙佐班超

邊騎慚共跨論功不自居讓美增吾價疊拜九重恩傳

遽將別也袖出冒君詩索我墨花瀉焚香展卷吟清妙勝

於麝如入水繪園如聽聯牀話見山語所見

言壽民總戎

今之

成容若鈍宦筆不鈍今之張仲治明日去朝 天重結香
山社只愁無車公欲去又難捨安得飛將軍奉 詔從天
下

述懷

興公欲賦遂初還竭盡微才莫濟艱敢戀肘懸金斗印祇
思身入玉門關集桑集柳憐黃鳥開鎖開籠羨白鷗願乞
長風起天末蒼生十萬換青山

畜眾安民詎有權毳廬獨坐似鍼氈願看他日花長好待
到層霄月正圓手續千言驚白種心經一卷懺紅禪釣鰲
我欲浮東海何必龍城萬里專

中秋夕與家人登汗阿林樓觀月

全家行萬里今夕忽三年月影人同滿秋聲雁獨先故鄉

方啖餅此處已添縣莫道高寒甚明朝是日邊

和幕中諸友庫倫中秋詩

今夜人間徧舉頭防秋使者獨悲秋
佛家無盡鐙多少只照歡娛不照愁

邊庭

冠劍年華已過丁飄飄形影尙邊庭
厓環瀚海東西白嶺界胡天內外青
豺虎負嵎風助嘯蛟龍縱壑水騰腥
萬人師長權安在空掩穹廬讀武經

九月初四日曉起見雪戲作此歌

昨夜天上述詩囚紛紛掇碎白玉樓
鐵衣都護方防秋聞此一躍撐雙眸
但見白徧青山頭零珠片玉無人收
大笑郊島豈敢偷高呼李杜相爲謀
一杯酒換千金裘百首詩

四朝詩歸目錄卷之
二
卑萬戶侯人間富貴如雲浮何必老死擁八騶吾其赤手
擒銀虯冰天雪地騎之遊玉皇知我憂先憂不許斗北將
身抽恍言三島和十洲雲斤月斧需重修汝亦桑土應綢
繆遲三千載再歸休

立馬

立馬天山最上頭萬方多難尙登樓懷歸豈僅朋堪畏止
謗何妨自更修若士胸中容海宇褚裒皮裏貯春秋邊夷
駭政須情恕遙滅宵衣旰食憂

李葆恂字文石奉天義州人官江蘇候補道有無益有

益齋論畫詩二卷

王閼運云文石以名公子多見通人少無宦情而篤嗜書畫通博精

鑒如數家珍

繆荃風師云君幼時即愛書畫尹丈

耕雲有髫年畫董狐之譽論畫詩專注唐宋名蹟推

究得失考訂同異與葉鞠裳

藏書紀事詩同爲荻林寶筏

論畫詩百首

錄廿一首

虎頭妙筆絕今古點染陳思作賦材神似武梁祠畫壁老

蓮藍本此中來

展畫居然世尙存晉陽圖並鼎彝尊書名試檢陵川集莫

漫詩題賀六渾

摩詰雪溪曾過眼蕭齋舒卷幾春風清暉摹本妙毫髮也

付紅羊小劫中

江千雪霽右丞筆千載流傳色斬新可惜竟遭屠伯手王

四庫全書
集卷六
三
嬌絕代落胡塵

張萱鼓瑟圖無恙殺粉調鉛古意殫省識飛卿詩句好額黃無限夕陽山

牡丹大幅刁光脣粉漬金鉤妙寫生署款卻防傷畫格石棱樹罅認題名

夜宴圖中妙寫生美髯小面足風情不因尺幅流傳在誰識開元羯鼓形

漠漠溪山粉墨輕江干初雪試閒行合教一段荒寒景付與南唐畫學生

江南半幅曾經眼元氣淋漓此幅俱魏府收藏標第一軸端元宰擘窠書

大點濃皴筆勢奇森森萬木攖蛟螭想從醺觴窗前挂驚

倒小長蘆釣師

襄陽著論未全誣尺幅流傳是也無蕭寺寒林今在否白頭才見讀碑圖

堂堂五老重睢陽北宋元明遞弄藏相對摩挲曾幾日半塘宿草意園荒

畫裏鬚眉盡老蒼合教洛社配睢陽焚香百拜才舒卷爲有溫公字數行

文畫蘇題一卷收後來學者只丹邱脩脩數筆如鸞尾合貯梁髯棲鳳樓

積雪羣峯寶范寬顰池題字記文安科頭散髮卧其下凜凜高堂六月寒

中立秋山紈扇本黨家傳玩到吾儕孟津細楷妙題品筆

法渾如積鐵崖

妙絕河陽秋霽卷幾年流落在江潭市中張賣無人識神物終歸寶華盦

元吉猿圖羅塞朋 仁皇題句賜臣昇攀籐飲澗紛多態如此王孫那可憎

舜臣畫卷送元明折柳裁詩無限情何似雪江歸棹記欸題親署太師京

樓臺隱隱暮雲遮柳外宮牆一道斜躍馬中原太麓俗祇騎欸段看桃花

眼底更無吳道子別開畫境屬襄陽雲山得意筆扛鼎莫誤元暉作阿章

鄭文焯字叔問一字小坡直隸承德人有小坡詩詞叢

稿

著述甚富倚聲尤冠絕一時品學均抗希古人爲卓爾不羣之士

楊柳枝詞

五首

數行煙樹薊門春
離袂經年惹麴塵
莫爲西風搖落早
霸陵猶有未歸人

拂堤晴縷萬絲柔
祇掃芳塵不掃愁
羌笛數聲鄉淚盡
夕陽紅濕水西樓

曉含斜月晚含煙
翠縷如雲挂玉泉
香輦不廻秋又暮
棲烏頭白近霜天

平居誰分解傷春
爭睹長楸走馬身
黯黯空城飛絮盡
哀笳吹起六街塵

雨洗風梳碧可憐
秋涼猶咽五更蟬
誰家殘月滄波夜

夜漁燈網碎鈿

吳俊卿字倉石浙江安吉人官江蘇候補知縣有缶廬

詩集

君工鐵筆得漢印章法吳彥復謂可與鄧完白趙搗叔並傳詩畫均超妙自然

坐雨和鐵老

窗外雨如鏃驟涼生葛衣滿庭蕉葉大入坐草蟲飛興賴

殘書遣秋遲一雁稀虛舟何處著江海願同歸

自注云曾爲鐵老題

虛舟縱浪圖

渡江

江風吹日薄江氣饒林昏杳杳迷京口荒荒接海門平潮吞野岸一鴈點秋痕空負澄清志憑誰擊楫論

溧陽訪孟東野遺蹟

爲弔孟東野孤城倚溧陽苦吟山獨抱多哭淚誰償知已縱寥寂平生何感傷世無韓吏部下拜亦尋常

太湖曉發

野店投荒三四間
渡頭齊放打魚船
數聲鴻雁雨初歇
七十二峰青自然

題倪雲騷冰天躍馬圖

揮鞭似打天山圍
漢家大將今數誰
堅冰在須雪沒脛
得意更搦裴岑碑

對酒

燈昏未昏晨鐘撞
月落不落橫紙窗
我歌寂寞少人聽
擬抱銅琶彈過江

飲桃葉渡

桃葉渡頭煙雨繁
飲酒快滌胸中煩
一斗亦醉一石醉
眼看江水人踏翻

趙上達字仲韜湖南衡山人廩生現官安徽皖南道

和蘭交落花詩三十首之六卽用其韻

麗華驕貴不須臾夢裡殘燈照坐隅
澆恨根愁三摘盡種因期惜十年迂
甘嘗蓼食蟲心饜冷抱芳茵蝶命孤莫爲
姬姜棄顙顙白頭記否舊當壚

乞將靈液灌頑骸無賴靈修信屢乖
黷面有時和淚洗掬肝無地把憂埋
山河影碎空中鏡兒女愁分夢裏鞵不信
東鄰窺宋久隔牆又見一枝佳

伯勞通籍鳳凰巢西燕分啼柳禿梢
香界不容鶉首翦粉痕已錯犬牙交
血埋碧玉三年化淚鑄黃金一笑拋太息
荃蘅芳已盡責言只合問包茅

嫁後黃姑隔絳河聘錢不抵別愁多
江山難贖嬋媛命神

鬼猶哀窈窕歌弓影每疑遺挂在釵盟可奈墜懽何廣寒
倘拓藏嬌地莫縱吳郎斧素娥

鳥使銜來密意香肥甘分割冊蜂王黃昏夜轉雷塘曲白
戰天開雪苑觴坐敝蘇裘嗤母媵忍牽蘭袖哭耶孃臣饑
欲死侏儒笑人面都非舊六郎

彩虹吐作英雄氣誤認淫氛誚玉蟾絳蠟愁煙香欲凍銅
壺恨漏水疑添網羅翠羽封塵匣刻畫螺鬟媚鏡匳索笑
莫辭探險隊有人飛度雪山尖

和繭安落花詩成并題絕句於後

彩筆權爲花請命窮簷如聽鳥銜哀蘭成蕭瑟徐陵豔一
樣江山兩樣才

江瀚字叔海福建長汀人現官河南開歸陳許鄭道

有東遊草北遊草

趙堯生侍御熙序其東遊草云江先生學人也去年開經濟特科大

臣以君薦天子承詔上京乃蕭然去勞勞日本之程凡江入粵禮重諸侯甚矣又蕭然去勞勞日本之程凡所爲皆迂闊不適事情者詩曰我瞻四方蹙蹙靡騁嗚呼知詩者通其故矣

塘沽

卸罷雲帆正落潮館人延客語喧囂倚門度曲紅裙陋入市橫刀碧眼驕遠道火車聲隱約近村土屋景蕭條長安咫尺翻情怯蹭蹬重來鬢已凋

至京師作

灰尋劫後淚猶潛斗覺承平氣象還無復金臺延郭隗那堪柴市弔文山依依蹤迹十年外落落交遊四海間明日陶然亭上去一尊聊爲破愁顏

贈喬二茂軒

伊昔遊京華年少志方銳事業期千秋意氣陵一世稽古

推杜馬論交喜莊惠

乙酉定交於伏魔寺

在遠德日敦積久心彌契

士衡再入洛去華重下第既嗟文

道希費懷

出復痛程

伯翰劉

鎬逝聚散果誰期巴山還把袂我橫博士經君考遺人制

余主講東川之五年倍彭苦饑君自成都來籌荒政

溫拯活鱗籍嘉招枉羔幣

是冬余有

湘水校經

共舉嶽麓雲

君因北上紆道長沙嘗同登嶽麓峯

更鼓吳江柁

復

邇近

吳門鉤黨方屏營郎曹且留滯達官煽禍亂干戈歟相繼

妄信郭景術翻助天驕勢

翠華遂播遷

玉殿亦扃閉

崎嶇難幸平萬方益凋敝剪燭話滄桑生逢猶攬涕茗茗

江海空寂寂天下計良時惜蹉跎虛名媿經濟相期五畝

營灌田娛晚歲

憶劉幼丹兵備

牙節新移到贛州家山近接貢江流祇應入境臺前月分
照天涯一段愁

寄沈幼嵐兵備二首

沈在日本觀博覽會未歸新除
成縣龍茂道

繁華海外豔東瀛豪舉爭誇賽會行惟有使君應不負考
工原只爲蒼生

三遷獨荷主恩優廉鎮依然錦水頭聞說西川諸父老
久勞延頸盼歸舟

贈王晉卿卽送其之官甘肅

一別九年懷抱惡詎知邂逅在京洛入門握手一大笑容
顏非昔情猶昨艱難苦憶罷官時爲言交態長嗟咨耳餘
賢者尙如此世上悠悠甯足嗤且喜中衛循聲遠繫渠利

過青神堰此日謁 帝明光宮墨綬宣來繡衣返况復著
書盈篋中一篇出手光熊熊戰爭廣采歐洲事摹寫頗有
廬陵風舊遊終自愛西蜀深悔當年宅未卜薛井還期重
煮茶杜祠尙記同看竹暫時聚首長安城青眼高歌空復
情自古枋鳩笑鸞鳳從來燕石勝瑤瓊黃金臺下一杯酒
起舞離筵動星斗人生會面須盡歡莫待它日空回首君
家倚劍崆峒山余亦吹簫吳市還韓孟雲龍有時過臨歧
何用涕汎瀾

余 棗字節高安徽望江人現官山西候補道

續秋漁雜唱四十首

錄十一

久卧滄江意若何悲秋重理舊時歌
滔滔今古無窮感一例都教付網羅

枉教蓑笠易衣冠來日依然事大難
新稅催如流水急直將搜索到枯竿

舉目江湖盡笱罾有人齊物感難勝
天池只未隨鯢化苦向人間俎豆登

蕭蕭晚景半江紅飛鳥參差返照中
興盡收筒歸去好莫因帆勢趁長風

江湖珍重散人銜淡盡名心對錦帆
頽岸草深行不了春風易起未容芟

水底蛟龍愁失水雲中鷹隼勢吞雲危磯袖手旁觀穩滿
志躊躇對夕曛

蒼茫日落弔長沙滿地停橈不算家幽怨靈均蘭芷託豈
關錦瑟怨年華

寒燈遠浦兩三星身世輕如水上萍月黑舟移潮信急苦
呼隣叟不曾醒

久病清癯黃菊似積年心事白鷗知何時學泛鴟夷艇湖
上煙波幾夢思

侯門長鋏未容彈遙夜灘頭念挽瀾長嘯一聲天地曉滄
溟湧出水晶盤

玉簫金管醉瓊卮鱸膾鳧葵味入時任彼雞蟲爭得失錦
衾休自負金龜

陳鳳翔字芟潭廣東澄海人有東阜老人遺稿

同方筱圃赴龍王廟勘隄歸途有作

出郭廿里近紆迴隄路長自來稱澤國今又變滄桑野曠
人家少時艱井里荒一釣新月上燈火見城廂
故道驚全失河流與岸爭茅簷栖斷陌盛漲逼層城瀨淺
飛湍急隄高積潦平招攜同一騎歸路暮煙橫

寄懷陳伯嚴吏部

三十一

出處關天運憂時感變遷乾坤半羈旅江海任風煙
逐世原無悶逃名定爲禪艱虞思共濟心跡託當年

答盛季瑩觀察

景璿

二律

天留文物在幽居大德名門世莫如一代風騷餘故宅百
年華屋賸遺書雲龍際會題襟好塵海蒼茫罷酒初勝蹟

四朝詩史甲集卷六
流傳今有屬笑他狐兔計原疏

不圖溽暑返林居商韻傳來落拓如載酒竟虛泉上酌捫
碑重觀壁間書深沈鼓角涼秋後迢遞星河夜露初劍氣
珠光憐我在白頭無夢愧余疏

題盛季瑩觀察柳隄驪唱圖

四首
錄二

長將書劍傲王侯楚尾吳頭繫客舟暫息塵勞悲白髮大
難風雨在黃樓騷壇文字空馳騁鴻爪因緣任去留白是
使君能好客雍容裘帶事清游

文采風流畫戟開梁園詞賦媿鄒枚揮毫已奪參軍席調

鼎同欽上相才

謂香帥

客思漫隨隄上柳歸途更折嶺頭梅

送行詩句應千首領袖騷壇世所推

洪述祖字引之江蘇陽湖人諸生現官直隸候補道有

如水齋詩

北江先生之元孫

雪後肯堂以詩見示和敬如韻

廿年不入山陰道雪後看山興仍好
竭來久作江海人四十男兒未云老
憶昔十五二十時孔楊視作大小兒
等閑負此好身手迺與樽酒歡相持
趙后昔問三無恙世以年豐占宰相
病夫亦復蒼生憂故人幾輩青雲上
滄溟靜日翻紫瀾空山歸臥知猶難
諸公白戰鬪鱗甲玉女一笑空中看
新詩各有高寒境變化飛騰在俄頃
海外方爲蠕蚌持宵深始覺魚龍靜
眼前大地無纖埃求仙何必尋蓬萊
紅爐綠醅萬事足無問西北浮雲來

秦淮感舊雜句

五首

細雨斜風暮復朝秣陵春事轉蕭條
賸餘新漲秦淮水綠過當年舊板橋

畫船銜尾拍橋東欲託微波路未通
不是昆明工教戰也裝艇子作艨艟

恩怨何須抵死分九原驃勇可知聞
一篇鸚鵡筵前賦猶作河廳感逝文

劉壯肅勇號驃勇咸同中興以來一人而已

學士風流近若何似聞風雨閉門多
遙知聽水山樓客一樣吟成春夢婆

願爲比翼總生天絕代湘蘭可並肩
千載墜樓人膾炙綠珠今有馬雲仙

汪雲仙本馬氏宦裔女流落秦淮所歡以療亡雲仙從容仰藥殉

通州弔劉葆真太史

宿草論時已再春招魂無地倍酸辛
嘔心文字爭多士灑

血塵沙換美人劫火故城空寂寂潞河秋水尙粼粼元戎
壁壘精嚴甚試問如何馬服君

重過螺江呈弢庵閣學

女螺江上載揚舲江水依然照眼青萬里壯遊嗤往事八
年舊約負山靈刺船已誤仙人島扣戶休疑處士星百尺
高樓今再臥試談滄海與君聽

陳弢菴閣學見示和易實甫詩次韻奉答

別夢方山已十霜好憑南雁寄愁腸風潮濤海猶傳箭晴
雪園林自暗香饋歲懷人思酒琰盟心歸櫂誓滄浪峭寒
幾日無新訊但覺春來晝又長

劉侶臣詩來賀出獄卽酬二首用東坡烏臺獄中韻

幽谷頻經五度春坐忘久置定中身豈期請室彈琴客復

四庫全書
卷之三
作炎天渡海人萬事乘除皆往復百年憂患見精神祇餘
文字爲投契並世梁汾竟有因

平生本有滄洲願每遇青山首欲低此日雲中歸白鶴往
年天上見金雞漫期趙尉資行橐且覓黎渦伴小妻拚作
釣徒酬 盛世煙波深處太湖西

出獄口占

五年眼不見青山今日看山眼倍饒人以鬚眉疑面目天
教閒散作頭銜早拚歸路尋黃鶴空有浮名滿赤嶽從此
不愁猿鶴笑具區西畔好收帆

繆鍾渭字邵生江蘇常熟人官候補通判有百不能齎

吟草

君精於醫學客居津門活人無算詩筆敏妙積稿頗富安曉峯侍御維峻爲作序推獎甚至謂

其長於古風取法漢魏故能骨力蒼堅意味深厚卽近體亦不失爲唐音

梅花嶺謁史忠正公墓

不盡滄桑感握衣拜墓門老梅護祠屋落日弔忠魂
驍將驕能制孱王志易昏江淮本殘局成敗不須論

報國孤忠盡誰堪伯仲間鞠躬漢諸葛正氣米文山事歎
權奸誤心傷國步艱千秋遺表在披讀淚潛潛

擬淵明飲酒四首 錄二

閒時但飲酒興至卽賦詩此中有真樂餘事非所知讀書
偶有得欣然竟忘疲會心不在遠吾道固在斯寓形天地
閒升沈任所之貧賤詎足厭富貴不可期卽令慕富貴焉

四朝詩史 卷六
三
能便相隨借問道旁人汲汲亦奚爲

藜藿足充饑何必饜梁肉
短褐堪掩形何必被繡服
無凍復無餒在我已爲福
無爲更多求名利受羈束
緬尋苦縣言知足乃不辱
持此一觴酒謝彼千鍾祿

懷閔生仲兄延安用五弟懷大姊韻

思君飛夢到延州
莽莽煙塵接塞秋
萬里寒風吹畫角
五更殘月隱邊樓
雁聲遠自霜天落
客淚多隨江水流
兄弟團圓定何日
關山迢隔亂雲愁

書憤二律

一木何堪大厦支
邊隅日夜羽書馳
已嗟待兔功難建
且補亡羊事未遲
江夏方移陶侃節
睢陽空盼賀蘭師
貔貅坐擁稱無敵
未肯同心報主知

倚劍高歌感百端側身南望海天寬
風鳴笳鼓軍聲壯月照旌旂殺氣寒
單騎無人走回紇長纓何日繫樓蘭
伏波矍鑠今猶昔銅柱勲名見豈難

初春獨游城南人家寥落古剎荒涼得詩三首

步履城南去尋幽信獨行
層樓團堊色古寺蕩鐘聲
岸跨石橋窄柳搖溪水清
青山初破睡螺髻露江城
地僻人家少崎嶇徑未諳
夕陽明壞塔流水繞荒庵
草淺綠難藉梅遲香已含
奚囊聊覓句勝境足幽探

竹徑煙常鎖松扉雲自緘
地偏近郊埜境曠隔塵凡
老佛藏荒殿昏鷄聚古杉
行行還復止不覺日西銜

津門秋日抒感二首

秋色蒼涼上郡城蕭蕭落葉作邊聲
視師淮蔡無裴度持

四庫全書
節匈奴愧子卿風湧波濤吹海立陣喧笳鼓挾雷鳴銀河
天上誰能挽一爲寰區洗甲兵

三韓遙望陣雲高風鶴驚傳神鬼號競說邊疆屯虎豹未
聞滄海掣鯨鰲臨淮壁壘終難恃李勣長城枉自豪借問
東征諸將帥策勛孰慰聖躬勞

紀大東溝戰事弔鄧總兵世昌

陰雲黧慘海氣黑王濬樓船誓殺賊兩軍鏖戰洪濤中雷
霆鏗鎗天異色高密後裔眞英雄氣貫白日懷精忠礮石
攻擊亂如雨血肉激射波濤紅敵艦紛紛多擊毀我舟力
盡亦沉水不分猿鶴與沙蟲全軍盡葬魚腹裏將軍麻險
得生出當留此身待異日志存滅虜圖再舉疇謂將軍節
遽失將軍大呼曰不然甯爲玉碎毋瓦全誓與士卒共生

死人死我生何覩顏嗚呼人生孰不死死亦要貴得其所
重如泰山輕鴻羽流芳遺臭俱千古將軍視死甘如飴凜
凜大節青史垂嗟彼軍前身伏法畏敵如虎亦奚爲

仲秋下澣至張家口

大漠秋風匹馬行高原極目壯心驚道旁黃葉紛辭樹塞
外青山半壓城有客天涯悲遠謫謂安侍御邊關終古事長征
前朝戰蹟何須問荒戍斜陽故壘平

奉贈安曉峯侍御

慷慨陳書動 紫宸男兒夙負膽輪囷朱雲折檻忠忱矢
鄒浩投荒直節伸天下爭傳眞御史邊隅欣遇謫仙人包
容自荷君恩厚雨露能回塞上春

上谷秋興六首 錄五

囊筆燕山北兩年三度秋陸機會入洛王粲尙依劉客思
愁聽雨鄉心倦倚樓囊中詩一卷聊以慰羈遊

關柳疏仍綠庭花晚尙紅暮雲低作雨涼月暈生風身每
逢秋健心猶出塞雄人生貴安命底用問窮通

關塞眞天險山川拱帝京當年資重鎮此地集精兵懷
古心猶壯悲秋氣漸平滔滔東逝水尙作鼓鼙聲

不盡古今感臨風發浩歌塞穿流水急天壓亂峯多心事
彈長鈇生涯辦短簑書成何處寄一雁度雲羅

萬里西風起邊塵改舊顏吟秋來遠塞訪古度重關倦鳥
紛投樹晴雲總戀山半生常碌碌媿爾各安閒

繆鍾湑字潼生江蘇常熟人有迂齋詩草

邵生之弟
力學早世

秋夜病肺

秋窗落木雨瀟瀟排悶裁詩破寂寥已是愁腸成百結那
堪病肺又連朝小樓風入燈逾暗短榻寒生夢轉遙歸去
尙湖待何日青山紅樹路迢迢

宣州途次遇也文姑丈南來

去年淮上一爲別一別經年鬢已斑恰喜異方逢至戚頓
忘故里隔重山半生飄泊風塵際幾日逍遙水石間等是
皖南舟畔客挑燈相對話鄉關

舟過金焦二山

朝過京江古渡頭金焦對峙不曾遊鐘聲敲到層巖寺霜
信催歸萬里舟雲樹成陰藏梵宇山樓倒影入寒流回看

夾岸人家近一是瓜舟一潤州

雲陽書事

時留滯雲陽
已旬日矣

江客久留滯思歸無限情朔風欺斷雁暮靄失孤城伊闕
書難到新豐酒更傾前程望鄉處遠水接雲平

薄暮山行

夕陽明遠林展步經山麓深徑不逢人芳草滋新綠古松
響清梵禪房隱修竹臨風聽飛泉憩石蔭喬木落霞散天
際野鳥相徵逐凌雲久眺望緣澗聊躑躅向夕聞鐘聲幽
懷滿空谷

秋夜對月

燈燼夜逾靜詩成人未眠樹凋星在戶漏轉月當天鶴警
寒零露鴻飛遠入煙誰家吹玉簫聲遞小樓邊

塞雁

寒色催征雁遙程極塞西
秋風妝閣夢殘月戍樓鼙天闊
數聲遠雲陰孤影迷頻年煩寄語盼斷是深閨

蘇臺弔古

館娃宮外數峰堆欲訪遺踪
蹋碧苔庭草無人埋曲徑江
天有月照荒臺采菱歌歇春何在
響屧廊空玉已頽吳越
霸圖都一瞬種蠡枉自騁雄才

塞下曲 二首

數向三邊成威聲振一軍有心破胡虜無夢返鄉枌甲冑
隨關月旌旗捲陣雲但憑腰下劍長爲建奇勲
朔風吹大漠萬里雪紛紛壁壘黯難見鼓鼙寒不聞飛沙
凋白草行雁沒黃雲不憚邊城苦惟思答聖君

七月十七日大雨雷電詩以紀之

吳中秋後猶燠熱驕陽連日無清風庭宇溽暑苦難避竹
榻冰簟難爲功今晨陰雲蔽白日四野慘淡煙濛濛電光
萬道金蛇掣雨勢飛瀑將毋同恍如帆檣乘風鼓大浪還
疑軍馬突陣趨長空驚濤雪飛懸絕壑霹靂怒激天爲紅
山岳崩摧江海瀉大木盡拔路不通倏然雨止晴曦出商
飆振樹吹簾櫳居人歡暢農父喜田疇浸潤秋禾豐安得
明日再雨洗妖烽邊隅從此無兵戎朝野晏然四海靖亘
天萬丈垂晴虹黃昏舉酒上高閣皓皓涼月升於東

蔣智由字觀雲浙江諸暨人有居東集均客日本時所作

先考忌日哭賦

哀哀蓼莪詩古人不能讀鮮民亦有親每時追懷哭憶昔
倚閭門望我奮羽翮風號木不甯高秋見永訣依依想容
德故山同律飢常恐不肖身零落先草木浩蕩天地恩尺
寸無報答

南北東西人余亦久行役故鄉日以遠音書每寥闕常恐
隴頭草牛羊或放逐不知松與楸同否前時綠秋風萬里
來霜露亦已肅顧念遊子身踐履常惻惕何時一拜倒鳴
咽墓前石

吾親仗義人行善性所樂每欲推此心拯濟及民物慘淡
志不成悲痛徹心骨卅角何昂藏慰親無憂戚豈知獲落

身窮老轉迂拙途窮日以暮驚駘不可策撫茲藐藐躬永在不肖列

讀史記管晏列傳

戴我者高天履我者厚地生我者父母信我者知己父母同天地知己與之比深情發愷論奇言含至理相齊者管仲薦仲者鮑氏未矜管仲功先高鮑氏義龍門之史筆千古誰敢擬何世無管仲何人似鮑子獨令管鮑名垂輝映萬禩厥後有晏嬰高風亦相似史遷下蠶室營救衆默止越石遇夷維一旦脫縲繫故云嬰尙在執鞭亦欣喜豈獨史公言吾亦欲云爾嗚呼在高位進賢固其職一士或失所子陽豈知恥列子說符篇列子窮容貌有飢色客言之鄭子陽曰列禦寇有道之士也居君之國而窮君無乃爲不好士乎臧氏未薦賢竊位孔所詆斷斷鄭子陽卽令官遺之粟

古大臣風度見秦誓彥聖實能容心好口無啻有技欣賞
之與己若無二媚嫉之小人厥心乃反是何以保我邦又
豈子孫利昌黎有奇語呼空欲薦士爲子言天扉芳菲出
肺腑吾聞生才難用才亦不易溯自三季來世道日交棄
秀稟生民人過半沈泥滓秋月吟蘿薜春風採蘭芷登高
望大雲不雨空逶迤京房易飛候曰視四方常有但
五色具而不雨其下賢人隱矣
見少微星照耀江海裏巖穴藏明珠廊廟失杞梓喔咿與
嚅唼煌煌被朱紫以茗爲梁棟塗之以丹堊風雨一朝至
傷哉終傾圯尙賢本太公墨家猶此旨親親尊尊與尊賢
尙功爲中國政俗
之二大分派周公太公各主其一說其影響遂見於齊魯
政治之間後世學者惟墨子主尙賢說○按上世爲種族的
的國家故多用親親說今世爲地域之類上與夷維昔爲太
的國家故宜用尙賢說此當別論之

公履泱泱之雄風海邦猶未墜鮑晏生其間克踵前人軌

吁嗟今則亡風流長已矣徒令懷古人高談鮑晏事

鳴蟬讀離騷絕句

西風一葉下亭皋明鏡今朝見二毛
賸有中原歌哭意鳴蟬滿樹讀離騷

浩浩太平洋二首

篋中藏元和汪君衮甫榮寶浩浩太平洋一律乃
近人詩中之秀者因步其韻

浩浩太平洋神州一髮蒼風濤來四極爭戰莽千場
歲旅春潮急瓊臺暮雨涼安瀾吾有策奇氣日撐腸

浩浩太平洋蓬萊鬱莽蒼神仙此高會花雨尙靈場
水入

櫻雲暖峯沈雪影涼林濤窅冥處仙樂斷人腸

伯牙至蓬萊聞海水

汨沒山林窅冥羣鳥悲號成水仙操一闕見琴苑要錄

陳詩字子言安徽廬江人布衣有尊瓠室詩

聞宋芝棟侍御出獄喜而有作

不見醴泉今兩載模糊消息使人疑

近有訛傳侍御將出獄而病卒者漢

冢已赦甘陵部坡老曾書元祐碑放鶴且嬉閒歲月看花
重理舊樽罍荒岡擁膝還如昨梁父吟成寄與誰

重過文芸閣學士舊居感賦

憔悴江潭舊逐臣清游曾此掩柴荆送窮韓子偏無術善
賦荀卿自有名待輯新詞成別錄劇憐良會似前生可堪
踏月元亭路籬豆花開蟋蟀鳴

酒樓醉歌呈吳北山先生

蕩蕩無由得廣場醉來天地一低昂嗣宗廣武空餘歎華
子中年已健忘笳鼓似聞喧大漠圖書終欲證扶桑吳絲

清角誰堪聽不是逢秋也斷腸

贈桂伯華

邂逅句吳域澄觀喜道存長齋肖摩詰清嘯得蘇門世宙
蛟螭閔風湍日夜奔斯人獨高蹈甘露沃靈根

送李拔可司馬還金陵

相見復相別輕舸問水濱苦耽方朔傳長念霍家親愴惻
求遺草清狂駭路人悠悠秣陵渡梅蕊動芳春

呈海藏先生

三年零雨輯幽詩一櫂清霜撫柳枝綽約鷗羣還可識沈
酣鱸膾竟誰知洛中言論歸高密吳下文章慨總持采采
秋英堪薄醉記曾騎馬習家池

陳 曾字可毅湖南湘潭人

留學東瀛究心吟詠積稿甚富余於己酉八月至東

京致查文科大學事宜君屢見訪余歸後寄五律二首相送其次章云斯人無可語逢子訴時艱古學論江戴人才慨馬班微塵滄海裏奇遇剎那間風雨蓬萊島有懷孫泰山

讀史四首錄一

末世王佐才蘇綽王景略學術本申商懷抱比管樂能運
子房幄能入郗生幕顧盼何清高矯矯人中鸚荷堅字文
泰帝王度恢廓草茅得奇士如魚不復涸舉國一以聽浹
旬至臺閣百政丕改革大與下民約秦勢日以張周地日
以拓信哉政治才可爲救時藥或乃譏事胡出處節有作
豈知豪傑士不肯甘淪落或爲許魯齋或爲荀文若上以
行其道下以拯民瘼倘遇國士知夷夏皆可託況夫大一
統原不分胡索春秋嚴華夷後儒所穿鑿強挑種界隙主

四朝詩史甲集卷六
權乃削弱二十世紀中民族同黃鶴盧梭瑪志尼其說久
糟粕軍國的國家主義乃浩博矧自炎黃戰久無真狄貉
同是五帝孫同居長城郭喃喃辨族姓早爲識者薄我讀
船山論惜其欠斟酌安敢駁王猛安敢罵蘇綽

讀近人詩三十首錄九

閩海詞壇鄭與嚴老陳風骨更翩翩詩人到底能忠愛晚

歲哀詞哭 九天 陳弢庵

子偲昔祇搜黔稿今日詩聲亦政聲一樣儒臣作開府胸
襟却勝庾蘭成 陳筱石

辭章治世一而已爲政爲詩兩未閒六代以還誰大雅風

華典瞻一樊山 樊雲門

廿年著述富虞卿湖海昭文識姓名我讀風人三百首解

詩惟有鄭康成

孫師鄭

倘知西學原東學應悟詞家卽哲家希臘詩歌傾世界煩
公輸入到中華

嚴又陵

來往金陵又幾時久聞人說李梅癡過江名士知多少爭
誦臨川古體詩

李梅庵

諫能耿直方爲貴詩到沖虛乃算高自是楚人善言語二
千年見屈平騷

趙芝蓀

舊憾茫茫那可填江山歌哭自年年天津橋畔難爲別楊

柳東風一杜鵑

夏穗卿

爲儒爲佛兩相宜世外詩心闕一奇如此才華銷受得宣
尼不學學牟尼

僧寄禪

東京九段靖國神社公園散步用黃公度東京不忍

池晚遊韻十五首錄四

楊柳輕輕門細腰隨夫過市太招搖相將並轡櫻花島來

看東瀛武士刀

西人每夫婦相攜過此

湘淮暮氣漢宮蟬一戰臺澎大海煙逃將旌旗游就館供

人戲侮自年年

公園有游就館貯所得之戰利品有吾國劉魏葉諸帥旗在焉

謝屐遊山歲幾經白雲深處履丁丁薰風汝肯吹儂去飛

到南天聚德星

遼東前事憾如何圭玷千年不可磨一自國無黃叔度更

誰人作出軍歌

謂公度京卿

周學淵字立之安徽建德人現官山東候補道有東海

頭陀詩稿

戊申除夕檢閱癸卯歲暮所步曾文正乙未歲暮感懷詩均十首益增滄桑身世之感又步前均爲後

十首 錄六

千載羲農去不還庭前雙鶴自閑閑眼中杯酒慚新進鏡裡風霜戀故山瓦釜文章同一映江湖魚鳥自相關安危身世終堪計望斷瓊樓夕照間

舊種杉松已十圍平安書札到庭闌沈沈鐘漏鄉思轉嫋嫋華堂旅燕歸萬古衣裳顛倒想九天雨雪夢魂飛何堪裘馬傾城客猶憶江東一布衣

浮雲黯黯阻長征朽索難驅四海鯨糟粕六經猶迹相衣

冠百體愧神行明堂枉自誇儒術前席何人奏治平負展
應回陽九厄睢麟官禮服重瀛

敢將冰雪傲蹉跎懊惱乾坤足嘯歌愛日何愁三釜少擎
天終負一官多須眉已燭寒潭靜肺腑當從慧劍磨猶恨
元龍豪氣在一竿東海掣蛟鼉

曾言治國戒烹魚瑣尾流離歎不如變法武靈猶可責和
戎魏絳豈云疏尊王當重春秋學報國寧持長短書東馬
嚴徐齊應詔可憐夏屋詠渠渠

茅齋安穩却風雷一枕黃梁夢覺纔佛國津梁雙祖合詩
壇壁壘六丁開龍飛甲子餘今夕駿業重光啟後來偃蹇
心情推賈島明璫何意托良媒

丁傳靖字秀夫江蘇丹徒人貢生

庚戌來京應舉貢廷試被放陳後庵閣學

延充禮學館總校時以吟稿見示感時憂世情見乎詞著有江鄉漁話滄桑豔傳奇行世

都門雜興

庚戌

居庸形勝舊山河一代風雲冉冉過玉宇繁霜邊鴈警金臺斜照亂鴉多哀時誰鼓漁洋摻變徵愁聞易水歌獨立蒼茫無限意西風吹淚對銅駝

漢家十世遇屯遭朝局元黃黨禍延風雨一天談紹述江河萬事逐推遷侍中痛哭原非醉宰相調停已自賢輸與慈仁老松栝長安及見太平年

麟趾高華內殿班絲綸能掌甲能擐門高江左東西錄花發淮南大小山夜月簪裾盈邸第秋風旌旆照瀛寰親親自有先朝法不在凌煙畫像間

四朝詩史卷六
會見曹司羨玉堂祇今清秘乞爲郎桓寬鹽鐵膏腴地漢
武舟車利市場柳拂章臺春試馬花濃杜曲夜飛觴一勾
倘得希文筆省却頭箕幾許忙

輿蓋喧闐塞九門承平無此錦乾坤匡扶人物羊頭爛謁
候勛勞馬足煩人滿漸愁都邑小官多轉覺布衣尊檐帷
一片腥紅染莫是哀鴻淚血痕

羣議紛紜集似麻諸天法會啟無遮雲霄迅厲三秋隼鼓
吹官私兩部蛙國事可如翻掌易奇才幾見脫巾譁福先
禍始憑誰問起看中天北斗斜

人物乾嘉最盛年承平觴詠望如仙遺書斷爛歸荒肆故
宅淒迷冷夕煙一代風流空輦下百年古淚落樽前片鱗
殘爪猶須惜異日追思信惘然

落落京華一布衣自攜詩卷看斜暉山川寥泚秋將盡風雨漂搖客未歸身計已嗟牛後拙鄉書苦說蟹螯肥黃花也似江南好開向愁中百事非

柳如是妝鏡歌爲曹君直作

絳雲樓閣煙飛夕墮下瑤臺秋月魄老樹飄殘豆莢紅香塵蝕盡菱花碧儂家生小住金閨攜得唐宮片影涼春入猩簾迎笑靨夢回犀枕照曉妝星眸相遍東林士此心早爲虞山死尙書髮白妾顏紅雙照盈盈入秋水拂水莊前月正圓我聞室裏望如仙脂痕春賦琴川漲鬢影秋涼笠澤船好夢方濃明社屋金甌殘破銅駝哭照見刀繩手握來郎意遲迴妾顏慙斜日西風白下潮江山金粉又南朝珠冠星燦蛾眉笑

阮大鍼以珠冠贈柳夫人見明季南略

玉轡風馳雉尾飄

柳如是戴雉尾冠與牧翁巾帽都非春不管年年鏡面黃
並轡出游見五藩總錄

塵滿詔獄風波問吉凶青銅一片懷中煖天許生還感不
禁玉臺差不負初心春風冉冉朱顏老暮雨瀟瀟白首吟
月到中天圓復缺分香賣履聲鳴咽廿載恩深一死輕鏡
籤灑遍啼鵲血泪漬塵封二百年背銘未泐土花鮮閱殘
泡影都如寄照遍悲歡總可憐查田寫入金陵景
初白金陵雜詠後人一見都稱幸蒲桃天馬亦尋常愛他曾照薜
蕪影勝國滄桑豔蹟多殘脂賸粉照山河玉京琴韻橫波
畫一種蒼涼可奈何

王國維字靜安浙江海甯人諸生現官學部主事有靜庵詩文集

天寒

天寒木落凍雲鋪萬點城頭未定烏只分楊朱嘆歧路不
應阮籍哭窮途窮途迴駕元非失歧路亡羊信可吁駕得
靈槎三十丈空攜片石訪成都

欲覓

欲覓吾心已自難更從何處把心安詩緣病輟彌無賴憂
與生來詎有端起看月中霜萬瓦臥聞風裏竹千竿滄浪
亭北君遷樹何限棲鴉噪暮寒

留園玉蘭花

庭中新種玉蘭樹枝長幹短花無數燦如幼女冠六珈躑

躅牆陰不能步今朝送客城西隅留園名花天下無拔地
扶疏三四丈倚天綽約百餘株我上東樓頻目極樓西花
海花西月海上銀濤突兀來日邊瑤闕參差出南園辛夷
亦已花雪山缺處露朝霞閒憑危檻久徙倚眼底層層生
絳紗窈窕吳娘自矜許卻來花底羞無語直令椒麝黯無
香坐使紅顏色消沮將歸小住更凝眸暝色催人不可留
歸來徑臥添愁悵萬花倒插藻井上

將理歸裝得馬湘蘭畫幅喜而賦此

舊苑風流獨擅場土苴當日晚侯王書生歸舸真奇絕載
得金陵馬四孃

小石叢蘭別樣清朱絲細字亦精神君家宰相成何事羞
殺千秋馮玉英

馬士英善繪事其遺墨流傳人間者
世人醜之往往改其名爲馮玉英云

金 石字夔伯浙江會稽人有勞自寬齋詩文集

皓月

皓月出海嶠列星粲以繁淨無纖雲翳清如明鏡寒阿閣
不長照西風吹紫蘭冥冥河漢闊浩浩霜露溥百丈銅仙
掌鉛淚瀉金盤

讀識

桓譚不讀識諤諤誠儒宗非聖者無法光武難優容郅惲
說新莽躬犯履虎凶不卽膏斧鉞固亦識之功咄哉此兩
君維秘緯是崇雖則殊廢興其惑將毋同

鼓瑟曲

秋河曉耿耿寒星澹無色仙掌瀉沆瀣清淚入胸臆渺渺
楚水波朝霧和煙織香芷拋浮塵釵梁磨舊刻鯉魚誰餐

尾黃鵠不比翼彈徧五十絃絃絃自秋唧

贈顧石公

石公居在盍山麓閉戶著書甘陸沈訪君幽徑想濠濮投
我新篇如谷音詩界漫從禪理證霜華早向鬢絲侵槁梧
坐據足消日任爾成虧昭氏琴

爲顧石公寫松花江蹋雪尋詩圖長卷并題

盍山詩骨特巋截勁若鷲羽斗上捩站壇列峙利觜距君
笑睨眎猶蠓蠓衝星劍引鳴天東鉅觥擁蠱鵬盤空酒酣
燒燭疾草檄十手磨墨聲隆隆松花江上夜雪壓曉看微
茫數峯插曾冰鋪絮澤腹堅駭浪乃受寒威撻鞭馬躍出
西關道粉堞旌竿凍痕渌負囊躅足兩胡奴頤隱於臍臚
肩胛老松倔強氣不下植隊蒼旃整以暇飛鳥絕影天沈

寥狂歌脫口風爲嘖流光客裏驚歲除故園梅訊今何如
龍蟠埜色浩無極結想碎玉鏘籜簌襍被歸來閱年九索
圖寄我雙鯉魚多君豪吟忘筆硯寫成陡覺百感集絕徼
風塵又一時撲筆蒼茫起獨立

壬寅中秋夕

冰輪穆穆漾金波可許纖塵點碧羅詩界華嚴彈指變酒
人肝膽得秋多未應銀漢橫流急却悵瑤樓好夢過搔首
山河明影裏西風無限樹婆娑

林社

清風合並巢居閣秋菊寒泉歲薦之繞屋梅花先手植隔
湖山色舊心期公補梅百本數登放鶴亭兀坐看山卽今落日祠雲黯緬想
憂時鬢雪垂去鶴寥天空結悵蒼茫萬感更無涯

送袁爽秋太常葬

瀕洞塵飛醜類橫封章痛哭有清卿芳蘭益見焚餘烈恨
海難從劫後平津柳迴潮秋尙舞湖風吹淚骨猶生似聞
追訟關西事惆悵潼亭大鳥鳴

秋日小園雜興

俎肉山河水逝東狙公事業馬牛風穿藜恰合蘭成賦餐
菊甘儕屈子窮自笑形骸同土木嬾看得失競雞蟲擁門
黃葉清如許卻喜衰顏被酒紅

話體操事

或作鳥伸或熊虎旨哉五禽養生主筋枯骨骸老顏侵會
撮拈天困痴僂至今體學傳歐西超距甯徒武節宜支離
來觀一歎息惡勞之悔何可追

閔爾昌字葆之又字公礪江蘇甘泉人諸生官分省補

用知縣

柳

風吹陌上塵白日送青春去年新種樹高高已似人

安慶秋感

大隄楊柳不禁攀又送秋風下玉關一夜鄉心聞白雁十年明鏡照朱顏誰爲日下荀鳴鶴苦憶江南庾子山零雨飛蓬各天末不將詩句慰淒然

和吳董卿二月十五夜有憶

玉宇淨於秋天河水不流盈盈一衣帶織女望牽牛碧海年年月金閨夜夜愁何當跨雙鳳飛向鳳臺游

又見春楊柳依依大道邊不辭攀折苦經歲復經年游女

明珠佩王孫軟玉鞭江南好金粉愁絕麴塵天

贈李瘦生

天涯不見吳歌雪

謂董卿

酒面頻邀李過江落木空山秋瑟

瑟疏鐙老屋雨淙淙孟韓交好憐同調曹檜風微陋小邦

與子論文期盡醉春膠浮玉快開缸

南鳴寂寂黯離憂西日茫茫下急流十載論交惟數子寸
心相許各千秋風花不盡飄蕭意寶劍空爲汗漫游對此
莫須談世事海天東望陣雲愁

歲暮送李美叔還揚州

瘦生之弟

故人有弟同爲客傷往嗟來倍黯然愛我自將兄事敬傭
書頗仗主人賢三年舊夢藹秋雨一別滄江臥晚煙太息
荒原今宿草知君愁詠鵲鵲篇

金支

五萬春花照酒卮
金支翠羽墮迷離
遙知官閣香殘夜
正是歌簾月上時

莫雨

怒潮東海走鯨鯢
十載河山往事非
颯颯靈旗吹莫雨
邦人還賽李侯祠

簡陳孝起京師

兩年飽喫東華塵
夾策何曾干貴人
貂纓車騎競馳騁
孑然人海藏一身
悲歌那足解羈寂
喜從鄉里來陳遵
與子納交在童稚
文書講肄連宵晨
浮蹤忽忽感飄泊
往事厯厯談酸辛
城南命酒強排遣
櫻桃三月斜街春
清吟妍唱雜諧噱
醉中肝膽森嶙峋
久居不樂更他適
別子見子意

氣真提攜襍被向陳衛霜淒月皎隨征輪中州文獻一憑
弔古來賢哲俱湮淪高名大節竟何有但留殘碣搜荒榛
黃流灝灝落天上太行黛色濃於皴詩翁到此無一字

此友

人見戲之言

山靈失笑河伯噉故人忽貽洛陽紙篇什一一燁

寶珍

君頃印近十年所爲詩日戊丁詩存郵贈數冊

上攀伯玉白高雋近躡元孝

逾清醕瀕行卻憶送我作辭義溫厚宜書紳交親相與貞
白首要儷雪柏儕霜筠神山風引不得到歧路奔走徒跋
踈跨鞍餐麥縱已慣俊味那便忘吳莼老我浪游亦云倦
今子薄宦寧非貧向長焉用畢昏嫁羊仲便可求居鄰五
湖三畝倘終隱去去煙波垂釣緡

張朝墉字白翔四川奉節人廩生有伯翔詩鈔

程雪樓中丞

德全

乞病還山送之以詩

殘春大地風兼雨塵沙蔽天滯行旅十萬生靈拜馬前是
時帥節剛解組天生豪傑世所欽出山一片無心雲黃塵
車馬五更夢黑水冰霜十載心庚子一變天地震六飛
蒙塵繞秦晉遠東更丁癸卯厄他人入室飛白刃邊城流
血殷松江彈花刀雨如風狂中丞忠義雲霄薄黃羊浩劫
悲紅羊輕身一擲見回紇立馬軍前氣飛越出死入生百
萬家奪隘斬關三寸舌大吏草疏騰天閭醞恩詔許同
平章漢家渥承將軍令二百年來破天荒天子園場初
弛禁墾荒先佩司農印徵兵儲餉靖萑苻畫井實邊建州
郡明農勸學柔遠人中朝近事在維新愛國苦心出奇略

憂時熱淚霑裳巾維 帝曰俞汝良弼三稔積勞已致疾
連番乞病荷 溫綸打疊還山今有日憶昔並轡馳名場
萬里青天飛海航疲驢悲秋雁鍛羽脫巾沾酒醉重陽黑
頭卿相歸田早蹉跎吾益嗟吾老一盃綠酒灑行旌啼鳥
聲聲歸去好

昭陵影片恭賦

百尺高陵壯彩霞當年曾駐五雲車龍城十二神仙窟
嶺三千帝子家王氣鬱盤山近遠秋光駘蕩雁橫斜 皇
朝仁孝先天下小鳥時鳴盼 翠華

鄧 實字秋枚廣東順德人

題黃石齋畫松石圖 有引

雪廬贈余黃公松石圖蒼潤矯特雖在春景夷猶
中已想見公歲寒之節讀公自記壬午暮春舟次
維揚則公作此圖之時其去甲申國變中間僅一
年耳去揚州之陷史公殉國僅二年耳當公蓬窗
啜茗坐觀景物豈意轉眼卽爲冷煙蔓草之場耶
城郭已非風景猶是覽圖神往爲題二絕

松石天成趣亦奇坐觀此景有誰知蒼容豈必無顏色不
獨凌寒歲暮時

不堪十日思前事幾見蓬萊清淺流今日憶公圖畫裏青
松白石過揚州

題徐侯齋畫山水

故山如有無中堪歎遺民落筆工
賣畫驢歸人獨坐數株松翠晚搖風

漳上松楸澗上堂兩賢遺跡渺滄桑
依稀一片殘山水罨畫人間幾夕陽

桑園

少日卽爲客逢亂今始歸中園幸投迹
暫與時事違寒食桑枝枝一作條青微雨霑春泥
讀書坐牆陰初陽上我衣遠矚芳原色
綠與風簷齊春暖欲眠蠶邨午常鳴雞
稚子有真性野老亦忘機昔聞隆中人
淡泊豈云非樂此守素業無營掩荆扉

六榕寺厲齋喜任二來訪

微雨寺齋寒偶此適無事秋苔沒行徑日暮故人至虞琴
試共彈魯酒不辭醉閒步出東軒欲打塔銘字

晚步溪口值月上有懷黃晦聞

晚步入孤村斜陽隱雨脚餘霞映水青殘煙暮花薄蒼然
雲樹昏暝色闊無着微見冥際火疏林帶叢落須臾新月
黃遠銜峯一角倒照碧潭深高掛翠屏削地白人影小波
冷魚聲躍獨立修松陰高下橫畫格清光爲故人相對成
寂寞離居抱端憂心期誰與託遙知樓居寒疏星照危閣
懸燈夢煙江江空響秋杅

秋夜檢亡弟秋門遺詩

白日忽已暮西風吹我廬幾日不出門庭葉落已無大野
空蒼蒼甯爲載愁區來日適大難去者不可呼海水日夜

東暫留難斯須嗟哉我弟兄壯歲多崎嶇南北萬里別坐
哭天一隅天寒各歸家慘慘顏色枯生無一命寄死無一
日娛汝歌動我懷汝吟憎煩吁汝病我鋤藥泥足荒邱塗
暮歸坐床頭寒燈照人孤一朝辭我去埋骨青山墟月明
荒草碧萬古長歔歔我悲汝不知辛苦獨愁予愁予亦已
矣生死竟何如寒風吹敝帷秋堂夜空虛黯黯青楓林魂
來若模糊展篋欲吞聲終宵白躊躇俯仰千載名人事恐
見疏感此不能寐起行步前除草蟲鳴我旁微霜沾人裾

鄧方字秋門廣東順德人有小雅樓詩文集

崖山行 六首

王氣煙銷憶武林兩崖雲雨晝陰陰胡塵幸免青衣辱仙
馭猶聞玉璽沈燕市啼鵲君已去吳峰立馬虜初臨頽垣
冷落慈元廟回首中原淚滿襟

當日偷安痛式微銷鍋半壁浙江圻王孫稱姪仇何在宰
相臨戎事已非漢水上游南牧伺錢塘宵漲北軍飛淒涼
葛嶺殘燈火曾送金輿夜出圍

秀山途從去蒼黃四廣三閩識語傷島寺行宮餘二帝泉
州血刃惜諸王授經尙講舟中學設鎮誰籌海外防滿地
白翎行不得鷓鴣聲急望家鄉

扁舟殘卒擁黃袍行殿飄搖濁浪高忠勇迎降元組練零

丁失利宋旌旄金牛山下秋啼鳥朱雀旗南夜落濤此去
碭州軍似墨五更風雨避征舫

餘生求地問占城片澳烽傳敵騎橫顧命空憐賢太后遷
都難復小朝廷紅羊刼換三分國白雁聲來四道兵太息
膠州沈落處琴彈破寺水聲聲

絕嶠開邊第一關國亡無計欸金鏐橐弓大將旗颿白杖
節孤臣袖血斑牛角山河悲出狩龍髯滄海夢生還年年
嗚咽三霄浪王母靈風想像間

潘飛聲字蘭史廣東番禺人

題師鄭先生詩史閣圖

天真長眞君家閣駕山筆力乾坤支神仙眷屬住天上揮
灑咳唾皆珠璣君爲詩孫實仙裔玉堂步武鸞鶴姿縹緲
錦贖十萬卷玉尺金管四朝詩古先聲詩後圖史國風可
補史之遺太白清平寓諷刺杜陵行在傷亂離李杜文章
唐史乘剗刻山水非所思詩仙詩聖宗李杜日月君以一
手持沈王張符選席散淫哇俚曲詩教衰龜山斧柯大削
伐耿耿天日蟠蛟螭道咸同光擬中晚漢魏唐宋多毛皮
誰出眞意造奇境倘存面目吾能知秀野草堂距咫尺千
年上下惟君期

袁瞿園吏部招飲重晤師鄭先生賦詩呈正

文史論心我輩纔
況逢仙侶樂追陪
江湖耆舊憑詩卷
風雪長安共酒杯
歌倚王郎休劍斫
船同徐福載書回
先生自海外宣南掌故從頭問取次春光到看梅
約開春遊西山諸名勝瞿園吏部有綠天香雪簪詩話先生有眉韻樓詩話均傳誦一時故第二韻及之

師鄭先生出示呂詹生女士遼東小草讀竟即用小

草中書素蘭集韵奉題

鮫綃撐出蛟龍舞
女媧補天裂風雨
獨憐風雨送殘秋
我昨遊山弔黃土
去歲遊杭弔石華女士
中華才媛多嬌弱
海外羅蘭

今再睹舌本香含五月花
手絲怨入瀟湘浦
閨中愛國大英雄
名譽雲霄見一羽
西王弱水迴雲車
側眼蓬萊自今古
此詩投向大遼河
光迸睡驪驚水府

蔣士超字萬里江蘇無錫人有振素盦詩鈔

澤州郭象升序云君

負才尙氣肝膽槎枒於人世名利夷然不屑早棄經生業治歐語甚精久遊燕冀詩益雄奇健蹕

輓潘烈士宗禮

縱橫六國東西帝誰識當年蹈海心
世界明星微一點可堪震旦夜沈沈

黃龍戍外朔風寒鳴綠江頭激怒湍
驅作水濤猶有恨中原屏障失三韓

五百童男意氣雄八千子弟海天東
太平洋水旋渦急拍拍潮流颯颯風

遊十刹海弔李西涯

激灩明湖一鑑開漫遊誰弔相公來
廟堂一代文章伯樂府千秋著作才
舊墅平泉虛竹石故園喬木委蒿萊
如今

胡馬時南下草綠單于萬里臺

宋韻翻用
茶陵詩意

雜感

逼窄乾坤夢易驚神州欲暮晚雲平江湖草澤英雄志風
雨河山哭泣聲大地魚龍方曼衍當塗豺虎竟縱橫八公
山在今何似依舊當年草木兵

雲氣飛揚帝子家陰風獵獵走胡沙羣空冀北千金驥腸
斷江南五月花地缺金甌紛問鼎波澄銀漢漫乘槎蓬萊
海上多歧路吹下迴風引已差

角樓摧落倚宮牆金碧觚稜淡夕陽滄海橫流猶浩浩中
原歲月去堂堂西山爽氣侵平野北斗京華捍太行霖雨
蒼生杯水在未容清濁擬滄浪

東南初日陰晴異西北高樓閭闔開瓠子秋風猶似昨蕪

城春色最堪哀
神山驚動全球震
子夜烏飛紐約災
既倒狂瀾嗟莫挽
驚聞地下有鳴雷
郭云大力運掉如金翅剪海古人惟少陵有之耳
彼美西方孰景從
英獅俄驚鼎湖龍
五洲厄運丁陽九
咫尺雲山莽萬重
大好湖山悲去國
合流江漢盡朝宗
當年復社人才盡
莫聽東林寺裡鐘

臨洛曉發

太行山不斷
一脈瞰臨洛
昨日京華路
今朝釜口陘
關城初日紫
隴樹曉煙青
莫上邯鄲道
黃梁夢已醒

題固關立馬圖爲程伯嘉觀警作

立馬岡頭第一峰
太行遙扼固關雄
千年城闕唐虞際
百戰河山表裡中
國手神州幾扁鵲
平定州鵲山上有扁鵲廟
側身天地盡沙蟲
淮陰終古留遺恨
冶水涓涓流向東

秋雨遣悶

萬里秋陰鬱未開
四山風雨逼人來
水黏鹵氣天真漏
佛闕潮音地不雷
滄海橫流誰砥柱
風塵多難獨登臺
橫汾歌罷樓船杳
雁落寒汀叫更哀

左挹黃河右太行
恆山北鎮鬱相望
三關舊戍連勾注
九曲洪流失呂梁
異代茅茨仍土穴
故宮禾黍愴汾陽
神州咫尺嫌山在
便溯清漳下濁漳

郭云高識冠
流厚力企古

遣興和郭子可階韻

太行迤邐黑如磐
倚劍長歌行路難
絕域黃河天外落
故鄉明月客中看
秋風南國人何處
夜雨西窗燭未闌
獨立神州堪把臂
知君邱壑此中蟠

朱聯沅字芷青浙江海鹽人現官學部司務

桂卿前輩
福說之姪

旭辰比部令嗣在京師大學高等畢業現方肄業文科大學研精文學專門根柢既深鑽仰彌篤允爲諸生之冠詩亦卓爾不羣受學於陳石遺深有悟入石遺亟稱之

春日獨登江亭

甍從郭外冷餘春稍喜禪天入眼新
芳事漫尋前度夢風光偏稱獨游人
無端涕淚牽遙睇是處鶯花逐暗塵
願有西山知此意斜陽半角掩孤顰

游二閭

放棹行行雨乍殘臨流濯髮覺衣單
少年裘屐成孤往斜日箏琶稱獨彈
此意定隨秋水遠微塵併入暮雲寒
呷魚漫靳商榷酒物外偷懽最是難

秋晚二首

一臥驚秋晚西風吹面寒天心兼醒醉人事各艱難按劍
亦何語開尊儻得懽吾師嵇叔夜疏嬾與人看

稍覺前塵妄蹉跎學散仙酒悲因地近花夢入天圓萬態
自終古吾生且少年楊朱非達者前路尙停鞭

感事

抱膝看天亦俊才功名氣盡故堪哀元知澣統千金藥坐
待嚴冰墮指來

和梁眾異近懷元韻

已罷追懽怨跡陳近緣學佛覺詩貧情枯漸畏親芳事骨
瘦差能稱酒人孤月沈幰猶繫夢癡雲窺鏡祇生塵幽尋
未忘年時意絕悔青衫悞此身

浮世

浮世甯從得散僊風塵摩眼重茫然情癡漫與天同醉夢
覺生憎月未圓漸識蠹魚非俊物坐聞鶯語惜芳年平生
未了心頭事誰遣銷湛到酒邊

送夏雲孫歸杭州

醉倚危樓瞰鳳城白雲南去月孤橫春人春酒都無賴易
水蕭蕭君且行

青帝無言白日長輪君歸臥水雲鄉吾今欲作西湖夢立
馬吳山看夕陽

重陽夜作

百年人共秋光老九日詩催客興長黃鞠疏棠自倚麗素
爭濁酒相徜徉朱樓倒影月在水哀雁不鳴天有霜誰與
良宵伴洪醉天隨子陸漆園莊

寄懷摛卿五兄

海雲薊樹兩蕭森別緒迢迢夢裏尋
苦憶謝池春草句小屏紅燭獨沈吟

寓書推學不辭勞衍石風流未寂寥
一語期君珍重看蒼生顏色久蕭條

白雲蒼狗尋常幻燕筑秦箏不可聞
片石寒陵獨誰語閉門風雪一思君

答東癡

日莫孤行覺路延閒吟破睡稍安便
愁湛酒海空添劫夢罨花龕不障禪
芳事故隨年事老春痕底勝月痕圓
豪崑日有微塵積一歎吾生井底天

黃 濬字秋岳號哲維福建侯官人宣統己酉 奏獎

舉人現官郵傳部小京官

才質穎異學力淵邃詩亦卓然成家與朱孝廉聯沅

梁孝廉鴻志同爲京師文科大學之秀今朱梁二君均供職郎曹未能卒業惟秋岳勤學不倦

十月十八日大雪中放歌用滄趣樓韻

衣棱衾鐵夢不續狂雪壓屋吾已諳劇憐天地不知夜故
放林表陰雲曇掘衣挾卷出門望官齋氣象殊潭潭六街
一色變輝晶恍見明月分二參景山亭閣屹尺咫高擁雲
葉嵌層巘舉頭逼視眩銀海北風冽骨顏皆醅巡簷哦句
數冰筋瘦日西匿宮鐘餽朔方習雪了不詫穹窒伏處如
逃鶴遙知江亭盛車馬攜榼何只人兩三衙官命觴御狐
白窮牖蓄糗無盈擔天心縱說惠農畝忍使凍餒增襁褓
忽思丙午歲既宴遣病吾頗聽何戡夜歸瑟縮犯風雪車

聲燈影堪追談。飈輪彈指今二十。長牘短髮披氎毼。歌臺豪興已消歇。唯有詩味猶深醅。食貧幸竊大官米。九載卜宅居宣南。瓊樓玉宇未敢羨。但願侍飲葡萄甘。

鐵扇子歌

并序

姜軍門玉順多忠勇公部將也。驍健絕倫。戰功最多。忠勇篤愛之。嘗有愬軍門於公者。公太息曰。吾鞭稍所指。姜玉順能爲我下之。是健兒安能繩尺拘也。公旣以擊叛回藍大順中礮。薨於盤屋軍門益落拓不偶。甲申戰事起。軍門渡臺以策干大帥。不能用。居常鬱鬱。每客坐酒闌。輒說忠勇西征戰事。泣數行下。然軍門短髮蕭騷。無復當年勝概矣。軍門手持摺疊扇。以鐵爲脅。因作歌紀之。

海風夜嘯臺江水赤嵌城頭甲光紫黃驄衰瘠鼓鼙哀慷
慨悲歌鐵扇子須髥蝟磔氣參雲吐語嵯峨隔座聞橫草
功名心未死逢人爲話多將軍咸豐初年寇起粵蛇豕縱
橫恣奔突南髮北捻相爭掎殺氣蕭條接回鶻胡公勝算
扼武昌力據重鎮防披猖誰欺健將曰多鮑多公騎戰尤
擅長將軍天縱號神勇百戰威名著關隴材官幕左精且
英燕領虎頭皆將種初從太湖收潛山陣雲直壓集賢關
大呼陷壁一辟萬鐵騎騰蹴輪朱殷其餘諸戰亦少偶生
縛名王常八九羽書日夕下江淮先聲偃走四眼狗江淮
孽寇非么麼將軍談笑刀納鞞追鋒鏖陣盡肉薄血戰猶
憶挂車河余時銜枚馬前走感激公恩翼左右麾城斬邑
敢辭勞金卬期當懸後肘中天明月刁斗寒起坐胡牀數

戰瘢南八男兒終不負可憐流俗枉譏姍秦川威策吹成
血孤軍慘淡兵如雪盤屋城邊白日昏橫飛鐵雨頭顱裂
名城雖墮悲難論裹尸馬革知 天恩從戎結髮愛兵士
三軍雨泣招英魂將軍身歿烽煙息射堂賓客歸南北諸
將乘時建纛牙當年樊噲誰能識自從棄置常歎嗟撫髀
歸去聽鼓笳興來獨醉市橋酒日暮學種故侯瓜比聞南
藩虜氛惡扁舟渡海雄心作上書大府僅報聞瘴煙黯黯
愁蕭索昨夜滕艫蔽海東鯢身兵火連山紅據鞍盤礴自
咄咄大旂落日來悲風卻向廣筵淚霑臆摩挲鐵扇無顏
色祁連高冢望西州九原毅魄應相憶我聞斯語心暗驚
時危頗牧翻歸耕君不見新亭舉目風景異猶說天河洗

甲兵

呂學正字養吾湖北武昌人官江蘇候補知府有樊山

集

潤生同年承瀚
之子穎慧工詩

獨居用涂主簿感懷原韻

寓廬鎮日不開門誰道春來氣候溫
山院雨聲悲破塊故園噩夢最淒魂
三山朱草添新淚一樹梨花憶舊村
帘外夕陽黯無色旅人惆悵對誰論

秋風四律

錄三

野闊天高猿嘯哀丹楓一色醉樓臺
三生杜牧原多感前度劉郎今又來
白下孤舟尚飄泊遼陽笳鼓逐塵埃
銅駝露濕征鴻泣楊柳無情鬱不開

悲國事也

匏瓜久繫又經秋青眼難逢價莫酬
羸馬敝車趨蔣阜白雲蒼狗弔遐陬
天涯淪落誰知己海上浮沈有舊游
雨雨

風風無賴甚青衫輕曳泣江州

感身世也

一自思歸不得歸愁心終日共雲飛俯臨江水秋方肅南
望家山笋正肥平地干灘真險阻楚天萬嶺總崔巍一官
流落金陵道獨酌新亭悔昨非

思故鄉也

馬雋卿中翰自籍赴都道過白門作詩送之

白門忽報故人來長夜追陪笑口開建業河山添舊恨帝
京桃李荷新栽上書我有長沙策論世誰如內翰才執手
徬徨無限思秋風送客上燕臺

寄嚴芟雲茂才清河

當年沽酒淮陰市

家君宰山陽時嚴子曾入幕中

楓葉紛紛夾岸紅臺下

稻花成夢裏橋頭刀劍識情中三山寄迹生鄉思八月乘
槎趁順風贈我郵筒臨檻讀天涯留滯與君同

袁克文字豹岑號抱存河南項城人蔭生現官法部主
事有抱存詩鈔

三月三日飲養壽園

新柳摻塵祛臨流待祓除賞心春事乍命酒杏花初還向
蓬蒿徑閒開水竹居弄舟憑浪轉覓句接歡餘

家大人示遊園詩命次韻一首

大好安陽負郭園閒庭未埽任花蕃會成真率招吟侶臺
上逍遙憶舊痕四壁圖書萬竿竹千山風雨一家村悠然
樂賦淵明句人境差無車馬喧

郊行

逐寒料峭風侵骨堆岸晶瑩雪染天指點長途煙霧裏幽
人慘淡駐征鞭

YORK UNIVERSITY

MAY 15 2001

EAST ASIAN STUDIES

東張仲仁費仲深蘇州次閔黃山韻

風光過眼獨傷秋，寥落河山感舊遊。
明月煙波鎖洄水，故人魂夢寄吳州。
掩歡緒向雲中結，遯俗心從天外求。
萬里蒼蒼一回首，夕陽盡處渺鳬鷗。

鸚鵡行

鸚鵡高飛不再回，振翼拂羽凌雲霧。
南來曾過吳江水，見棄還向隴山住。
翠衿綠水天然奇，簾櫳何計綰別離。
琵琶已非鸚鵡去，夜來空說入夢時。



